

Regional News Unit AIR Aizawl
Monday, December 09, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizoram state human rights commission dinna atana inpuahchahna kal mek thla hnih dawn a tling tawh chungin engmah tihfel a la awm lo.
- Mizoram sorkarin kumin September ni 1 atanga November thla thleng khan cess atangin cheng nuai 442, sing 9, sang 8 leh 664 hmuh a ni tawh.
- Union Home Minister Amit Shah an Jodhpur a Border Security Force dincham vawi 60-na a hmanpui.

<><><>

SHRC

Mizoram state human rights commission dinna atana inpuahchahna kal mek thla hnih dawn a tling tawh chungin engmah tihfel a la awm lo.

Sorkar official-te hnen atanga thudawn danin state human rights commission (SHRC) dinna tur atan hian October ni 11 khan hriattirna chhuah a ni a. Chutah chuan Protection of Human Rights Act, 1993 section 21 tlawhchhanin Mizoram larsap chuan SHRC hi a din a ni tiin ziahlan a ni a. Chutih lai chuan chairman leh member 2 turte ruat an la ni lo mai ni lovin a zawn hna thawh mek a ni a. A zawngtu committee hian a hmuh chuan sorkar pawmpui turin rawtna a thehltut dawn a. Commission a thawk tur dang mi 13 lak phalna hi sorkarin a pe tawh chungin lak fel a la ni lo bawk a. Official-te chuan he'ng la tihfel lohte hi bawhzui zel a nih thu an sawi a ni. SHRC hi din tura na taka nawr a nih hnu-ah pawh Mizoram sorkarin a din lawk loh avangin Gauhati High Court chuan kumin September ni 6 khan thla 2 chhunga din ngei turin thupek a siam tawh a. Chief Justice Vijay Bishnoi leh Justice Michael Zothankhuma te thutna division bench chuan thla 2 chhunga din a nih loh chuan sorkar chu na taka hrem a nih tur thu a lo puang tawh a ni.

SHRC din ngei tura nawrna atan Zofa Welfare Organization (ZWO) chuan an president Rev. Robawia hmingin kum 2021 khan High Court-ah an lo thlen tawh a. Chumi kal zelah chuan SHRC din tur hian High Court hian sorkar chu thu a pe ta a ni.

<><><>

GOVERNOR

Governor Dr. Hari Babu Kambhampati leh a nupui Lady Governor Jayasree Kambhampati te chuan nimin khan English Congregation Church, Mission Veng, Aizawl te'n Christmas lo thleng tur puala hun an hman 'Pre-Christmas Celebration' an chhim a.

Pre-Christmas Celebration inkhawmah hian Rev. Dr. V. Laldinglana'n Christmas awmzia tih thupui hmangin thuchah a sawi a. Special item benglut tak takte entira ngaihthlak a ni a. Governor hian inkhawmte hnenah Christmas pual thilpek a sem a ni.

Pre-Christmas Celebration-ah hian Mizoram DGP Pu Anil Shukla pawh a tel a ni.



CM

Chief Minister Pu Lalduhoman Sakawrtuichhuna Tawngtai Bethel Camping Centre (TBCC) nimin khan a tlawh a, an chawhnu inkhawm telpuiin Christmas leh kumthar an lawmna tur cheng nuai nga a pe. Pu TBC Lalvenchhunga, bialtu MLA, Adviser to Chief Minister ni bawk chuan Chief Minister hi a tawiawm.

Thu a sawinaah Pu Lalduhoma chuan, Mizorama home hrang hranga enkawl mek te tan sawrkar chuan buhfai kg khat Rs. 6 anga chhut in thla thum danah quintals 6636 vel a pe chhuak thin a. A man a tlawm em avangin tihsan hlek a, mihring pek zat tihpun an rilruk mek a ti a. Tuna an pek mek hi mi 14,788 te tana chhut a ni a. Home a enkawl hi tlem tial tial se an duh laiin an pung tial tial avangin Buhfai pek chhuah zat hi tihpun a tul hmel a ti.

He hmuna enkawl mekte chu thuawihna hlutzia hre turin a fuih a, rilru hrisel tak pu a, zawm tur apiang zawm a, hnehtu ni tawh turin inbuatsaih se, Chhungkua leh khawtlang tana mi tangkai tak tak an ni leh thei tih ringhlelh lo turin a chah a ni.

Inkhawm kaihruaitu Pu TT Zohmingthanga chuan, Chief Minister chu lakluh a nih ni khan, ama ina amah lawmpui tura a unau pungkhawm te pawh thlahlel zo lovin he hmun tlawm tak hi a pan hmasa a. Kha a thiltih kha an theihngilh thei tawh lo a ti a. Christmas thilpek kengin a lo kal leh dawn a tih ang ngeiin a hmel an hmu leh chu an lawm takzet a ni a ti.

Pu TT Zohmingthanga leh a nupui Pi K L Hmangaihzuali ten rinna behchhana an enkawl, ruihhlo ngaite enkawl na hmun, TBCC ah hian mi 1270 vel an awm mek a, Chief Minister Pu Lalduhoma hian Chief Minister atana lakluh a nih ni, December ni 8, 2023 khan ama chenna in pawh a pan hmain a lo lawh tawh a. Nimin, a kum khat cham, December ni 8 hian a tlawh leh ta a ni.



CESS

Mizoram sorkarin kumin September ni 1 atanga petrol leh diesel man atanga chhiah a tihpun atangin, November thla thleng khan road maintenance cess leh social infrastructure & services cess atangin cheng nuai 442, sing 9, sang 8 leh 664 hmuh a ni tawh.

Taxation finance department chuan August ni 30-a hriattirna a tihchhuahah petrol leh diesel-ah litre khat zelah social infrastructure & Services cess cheng 2 leh kawngpui enkawl na atan cess cheng 2 ve ve lak a nih tur thu a chhuah atangin chhiah hi lak tan a ni a.

October thla khan cheng nuai 16, sing 4, sang 8 leh 352 hmuh a ni a. November thla bik ah cheng nuai 426, sing 5 leh 312 a ni a. November-a chhiah (cess) lut a tam nachhan hi October thla khan khawl lamah fel lo a awm avangin petrol dealer-te'n pawisa an thun theih loh avang a nih thu Taxation Finance Department lam hotute chuan an sawi a ni.

Tuialhthei mana chhiah lak hi sorkar chuan Road Maintenance cess chu kawng enkawl na atan liau liau a nih tur thu an lo sawi tawh a, social infrastructure & services cess chu zirna in tihchangtlunna atan te, hriselna kaihnawihha hman atan te, skill development leh hmeichhia te chawikanna (women empowerment) atana hman tur a nih thu an sawi a ni.



CHILI

Champhai District-a Khuangthing khawmite chuan an hmarcha thar hmasak cheng nuai 60 hu an hralh tawh a, kg. khatah cheng 400 leh 415 inkarin an hralh a ni.

Khuangthing VCP Pu Zothanpuia hnen atanga thu dawn danin, thingtlang loneitute'n kumin November leh December thla chawhma lam thleng a Hmarcha an thar hmasak atangin Cheng nuai 60 chuang an lei tawh a. Hmarchate hi an khaw kawthler remchang lai leh khelmual ah te ni 3/4 te phovin, a ro hnuah a that dan a zirin Kg. khat Rs. 400 atanga Rs. 415 thlengin an hralh a. Kumin Krismas leh Kumthar 2025 inkarah hmarcha te hi a thawh hnihna atan an lo leh ang a. A thawh khatna ai chuan hmarcha hi a an thar hlawk zawk turah an inbeisei a. Kuminah cheng nuai 200 chuang man hmarcha tharchhuah theih an inbeisei a ni.

Khuangthing khawtlang hian nikum 2023 khan hmarcha an hralhna atangin Cheng Nuai 120 chuang an lo hmu tawh a, kuminah hian kum kalta ai chuan thar tam zawk an in beisei a, an hmarcha thar chhuahte hi Mizoram State pawn atanga sumdawng lokalte'n an lei sak thin a ni.

Khuangthing kuaah hian In dinglai 370 awmin, Tlangram lo nei thin hi Kum tin chhungkua 270 atanga 280 an ni thin a. Nakkum 2025 a thingtlang lo neih tum a Lo number pawt pawh chhungkaw 300 an tling phak a ni.



DRUG SEIZURE

Kumin January thla atanga November thla inkar, thla 11 chhung khan Mizoram Police leh excise & narcotics department hnathawkte chuan heroin kg. 121 leh gram 895 zet an man.

Department pahnih hotute hnen atanga Akashvani Aizawl thu dawn danin ruihhlo do kawnga danin thuneihna a pek Police leh excise & narcotics hnathawkte'n methamphetamine an man belkhawm chu kg. 690 leh gram 53 zet a nih bakah ganja kg. 880 leh gram 554 an man bawk a ni. Police hian kuminah crystal meth hi vawi 3 manin an man zawng zawng hi kg. 35 leh gram 155 a tling a. Excise hnathawkte hian kum dangah crystal meth hi lo man tawh thin mah se kuminah chuan an la man lo a ni. Heroin, methamphetamine leh ganja bakah hian Mizorama thalaite'n an hman sual nasat khuh damdawi, alprazolam, nitrazepam, diazepam leh tramadol thahnem tham tak an man bawk a. Police hian an ruihhlo man hlut zawng an sawi lang a, excise and narcotics department erawh chuan an tarlang ve lo thung a ni.

Police IGP leh chief public relations officer Pu Lalbiakthanga Khiangte sawi danin Police bik hian thla 11 kal ta chhung khan ruihhlo chi hrang hrang cheng vaibelchhe 201 leh nuai 47 hu an man a. Ruihhlo kaihhnawihah thubuui 327 ziaklutin mi 448 Police te hian an man a ni. Police hian heroin kg 77 leh gram 422 an man a, chu chu cheng vaibelchhe 23 leh nuai 22 hu a chhut a ni a. Methamphetamine hi kg. 557 leh gram 424 manin cheng vaibelchhe 72 leh nuai 46 hu ni a chhut a ni a. Crystal meth hi February, May leh July thlate khan manin a vaiin kg. 35 leh gram 155 a tling a, hei hi cheng vaibelchhe 105 leh nuai 46 hu zet a chhut a ni.

Excise and narcotics joint commissioner leh department thupuangtu ni bawk Pu Peter Zohmingthanga chuan thla 11 kal ta chhung khan heroin kg. 44 leh gram 473, methamphetamine kg. 132 leh gram 629 bakah ganja kg. 585 leh gram 629 an man thu a sawi a.

Ruihhlo bakah hian Mizoram Liquor Prohibition Act 2019 tlawhchhanin rakzu litre 62,400 chuang leh a senchi tam tham tak an man a. MLP Act leh Narcotic Drugs & Psychotropic Substances Act, 1985 hmangin lirthei 80 an hreng a, dan bawhchhetu mi 6,725 an man bawk a ni.

<><><>

HOME MINISTER

Union Home Minister Amit shah chuan nimin khan Jodhpur -a Border Security Force dincham vawi60-na a hmanpui.

Amit shah chuan kum 60 chhung zet BSF te chuan ram venhim hna an lo thawk tawh a ni a ti a, an tel lo chuan Ram a kal thei tak tak tawh lo a, a tir ah battalion 25 a bul tan kha tun ah chuan hma a sawn zel a ni a ti. Home Minister chuan kan inkhaihruaina mumallo tak thin pawh pu Modi a sawrkar ah chuan a inthlak nasa hle a ni a ti a, India sawkar chuan Ramri a kan hmanrua te a ngaipawimawh hle a, hemi atan hian kum tin sum hman tur bik siam thin a ni a ti. Ramri a awm khaw hrang hrang te pawh sawrkar in scheme thar a kalpui thu a sawi a, khaw sang³ vel ah kalpui tan ani tawh a ni a ti. Paramilitary force te chu an harsatnate sukiang tur in sawrkar in hma a la zel ani a ti. Amit shah hian parade a endik bakah jawans te chawimawina hlan a, an hnathawh te avangin gallantry award, police servoce medal a pe bawk.

<><><>

EXTERNAL AFFAIR MINISTER

External Affairs Minister Dr S Jaishankar chuan Manama Dialogue ah West Asia tan a India thil tum hrang hrang te a sawi a, India chuan kum tin a Gulf Cooperation Council (GCC), Iran, Iraq leh mediterranean ram te nen a insumdawntawanna te a sawi a, heng ram te nen a thawhhona hian hmasawanna kawngah nasa takin a pui ani a ti. Jaishankar chuan India hmalam hun a tan he bial hi apawimawh hle ani a ti a, ei leh bar zawanna kawng a te bakah thiamna leh thil hmuchhuah kawng a thawhhona kawng a partner pawimawh tak anni chho mek a ni a ti. Tun hnai a G20 summit a puan India -Middle East Europe Economic corridor(IMEC) chuan Atlantic leh Pacific thleng a inbiakpawhna tha siam a tum a ni a ti

<><><>